

# Uskup Asia diseru turun padang hadapi cabaran pastoral



Para perwakilan konferensi-konferensi para Uskup Katolik Asia berhimpun di Thailand sempena Ulang Tahun ke-50 FABC, Okt 12- 30, 2022.

**B**ANGKOK: Dalam “dokumen akhir” selepas sidang agung di Thailand pada Oktober tahun lalu, Federasi Konferensi para Uskup Asia (FABC) menggesa para pemimpin Gereja untuk aktif “turun padang” dan “menghadapi keutamaan pastoral baharu.”

Dokumen itu dibentangkan dalam talian pada Mac 15, 2023, lima bulan selepas persidangan agung ulang tahun FABC ke-50, Oktober tahun lalu.

Ia dipanggil “Dokumen Bangkok” yang menghimpunkan perkongsian refleksi oleh peserta persidangan itu, sebuah acara yang digambarkan oleh Kardinal Charles Maung Bo dari Yangon, presiden FABC, “peristiwa penting untuk perjalanan Gereja-gereja Asia.”

Kardinal Bo berkata perhimpunan pada Oktober lalu yang menghimpunkan 226 orang awam, lelaki dan wanita tertahbis, paderi, Uskup/Agung dan kardinal dari 17 persidangan episkopal dan dua sinode Gereja Oriental di Asia adalah “dialog dalam perpaduan dan permuafakatan.”

**Dokumen yang menterjemahkan kehidupan komuniti** “Dokumen Bangkok”, jelas prelatus itu, bertujuan untuk menterjemahkan kehidupan komuniti perbincangan semasa perhimpunan tersebut yang membawa tema “Perjalanan bersama sebagai Umat Asia.”

Dokumen itu mengajak Gereja di Asia untuk kembali kepada umat “dengan jalan lain” seperti apa yang dilakukan oleh Orang-orang Majus dari Timur selepas bertemu dengan Yesus di Bethlehem.

Digubal oleh sebuah jawatankuasa yang diketuai oleh Uskup Pablo Virgilio David, presiden Konferensi para Uskup Katolik Filipina, dokumen itu dibahagikan kepada lima bab yang memberi tumpuan kepada “sinodaliti,” cabaran-cabaran

yang muncul dalam masyarakat Asia, tindak balas terhadap cabaran pastoral, hubungan antara Gereja Asia dan Gereja sejagat, dan kehadiran pastoral Gereja di Asia.

## **Kupasan realiti gereja-gereja Asia**

Lima bab dokumen setebal 40 muka surat itu bertajuk, “Berjalan bersama”, “Melihat realiti yang muncul di Asia”, “Meneliti apa yang dikatakan oleh Roh kepada Gereja di Asia”, “Menawarkan Karunia-karunia kita iaitu Budaya dan Kerohanian Asia” dan “Membuka Laluan Baru.”

Dalam bab “Perjalanan bersama”, ia membincangkan isu-isu bagaimana bertindak balas terhadap “panggilan sinodaliti.” Ia juga mengupas tentang “tiga elemen penting” gereja sinodal, iaitu Komuniti, Penyertaan, dan Misi.

Bab kedua dokumen itu melihat realiti Asia dan cabaran yang dihadapi Gereja di Asia.

Antara cabaran yang dikenal pasti ialah :

- Migran, pelarian dan orang Asli
- Keluarga sebagai asas masyarakat
- Isu-isu berkaitan gender yang mencabar Gereja dan komuniti
- Peranan wanita dalam masyarakat Asia yang pantas berubah
- Cabaran belia
- Kesan teknologi digital dan krisis iklim
- Menggalakkan Ekonomi yang saksama dalam menghadapi Urbanisasi dan Globalisasi
- Dialog Antara Agama

Dokumen itu menggesa Gereja untuk melakukan tindakan pastoral, dari fokus kepada keluarga hinggalah kepada peranan kepimpinan wanita dalam komuniti gereja.

Gereja-gereja juga digesa untuk lebih peka dalam penggunaan teknologi digital dan menjadi “jambatan dialog dan perdamaian.”

Gereja juga dipanggil untuk menjalankan kursus pemi-

naan untuk klerus dalam konteks dan budaya Asia.

Dokumen itu juga mengenal pasti “jalan baru” yang akan diikuti oleh Gereja-gereja Asia dalam karya-karya penginjilannya, termasuk “anjakan paradigma” dengan model dominan kepada pendekatan inkulturasi sejati.”

Komuniti Ekleksial Dasar atau Komuniti Kristian Dasar diajak untuk “meluaskan kepentingan khemah mereka” dan menjadi realiti yang juga melihat di luar sempadan bagi memperluas hubungan dengan lelaki dan wanita pelbagai iman.

Dalam kehidupan ekskleksial, “lonjakan kualitatif” dari dialog ke “sinodaliti aktual” dicadangkan, manakala dalam pewartaan Injil, harus ada peralihan dari “pewartaan abstrak” kepada “menceritakan kisah iman yang diinkarnasikan dalam kehidupan.”

## **Menyentuh jiwa Asia**

Semasa pertemuan mereka pada bulan Oktober, para pemimpin Gereja Katolik Asia komited untuk “memberi respons positif kepada “tangisan bumi dan tangisan orang miskin.”

Dalam mesej kepada “Umat Asia”, para pemimpin Gereja berkata mereka “dicabar oleh suara yang berbeza dari benua kita yang majmuk, bahawa kami mendengar tangisan meminta pertolongan dan keadilan.”

Dalam satu kenyataan, para Uskup Asia berkata mereka dapat “menyentuh jiwa Asia” semasa perhimpunan dan konsultasi yang diadakan di Thailand, pada Oktober 12-30, 2022.

“Kami diinspirasi oleh harapan, keberanian, dan keazaman yang ditunjukkan oleh Gereja-gereja di Asia untuk berjalan dan bekerja bersama, dengan lebih berdedikasi untuk Asia yang lebih baik,” demikian kenyataan para uskup tersebut.

Mereka berkata bahawa “dalam doa dan semangat kerjasama”, mereka tekad untuk bertindak balas terhadap cabaran yang dihadapi di rantau ini, “dengan bergantung pada kuasa cinta, belas kasihan, keadilan, dan pengampunan.” — *LiCAS news*

# Kehilangan orang tersayang akibat bunuh diri

Kolumnis *New York Times*, David Brooks baru-baru ini menulis artikel mengenai rakan lamanya, yang mati akibat bunuh diri.

Dalam menggambarkan rakannya dan penyebab yang menyebabkan bunuh diri, Brooks menyatakan bahawa ramai orang yang memerlukan pencerahan dan masih ramai yang tidak memahami tentang bunuh diri (*New York Times*, Februari 9, 2023)

Rakannya, Peter, kelihatan bukan seseorang yang mati dengan mengambil nyawa sendiri. Peter mempunyai perkahwinan yang indah, dua anak lelaki yang penyayang, rakan-rakan yang baik dan karier bagus sebagai doktor di mana dia banyak berpuas hati kerana dapat membantu orang lain.

Apa yang ditulis oleh Brooks dalam mendokumentasikan perjalanan rakannya harus dibaca oleh semua orang. Apa yang ditekankan oleh Brooks dalam dokumen itu?

Pertama, bahawa dalam kebanyakan kes, bunuh diri adalah penyakit.

Orang tidak memilih untuk tenggelam ke dalam kemurungan seperti ini.

Ia tidak dapat dibandingkan dengan barah, diabetes, atau lemah jantung.

Sakit seperti itu melemahkan, ia tidak dapat keluar atau sembuh berbanding dengan penyakit fizikal yang boleh disembuhkan atau diatasi dengan kemahuan kuat dan

sikap positif.

Tidak ada semangat atau ubat untuk anda keluar dari kemurungan bunuh diri dengan mudah.

Lebih-lebih lagi, kemurungan bunuh diri bukanlah sesuatu yang kita fahami, apatah lagi sebagai orang luar, ia sukar difahami.

Kedua, kemurungan itu mengerikan, mimpi paling ngeri dari semua mimpi buruk!

Perhatikan bagaimana William Styron menggambarkan kemurungannya sendiri dalam memoirnya, *Darkness Visible*, "Saya mengalami kekejangan batin yang hanya dapat saya gambarkan sebagai keputus asaan di luar jangkauan putus asa. Penyakit ini timbul pelbagai kejadian buruk. Saya tidak pernah terfikir akan mengalami kesedihan yang amat menyeksakan.

Kemudian, penderitaan itu diburukkan lagi oleh fakta bahawa sebahagian daripada anatomi penyakit ini, adalah mustahil bagi si pesakit untuk menceritakan dengan jelas kesakitan yang mereka alami.

Oleh itu, mereka bersendirian dan menyimpannya di dalam hati, terasing dan dengan bersendirian, datang sebuah perasaan yang sangat kuat, yang mendorong orang itu memikirkan adalah baik tidak menyusahkan keluarga dan rakan-rakan, dengan meninggalkan mereka melalui membunuh diri.

Dalam menyembuhkan depresi bunuh diri, ubat dan psikiatri boleh membantu tetapi rawatan kemu-



Fr Ron Rolheiser

rungan adalah terhad dan kurang berkesan.

Apa yang perlu kita lakukan apabila kita berhadapan dengan seseorang yang sedang mengalami kemurungan yang melumpuhkan seperti ini? Dalam usaha mencari jawabannya, mungkin kita dapat dibantu dengan cara *via negativa* iaitu apa yang seharusnya tidak kita lakukan.

Brooks berkongsi dengan tulus, tetapi tidak berjaya dalam usahanya membantu rakannya. Sebagai contoh, dia mengingatkan Peter tentang semua berkat indah yang dia nikmati dan betapa hidupnya dilimpahi berkat.

Kemudian barulah dia menyedari, mungkin tercetus pada fikiran rakannya bahawa dia semakin murung kerana tidak dapat menikmati semua perkara yang sangat menyenangkan.

Juga, kita tidak boleh bertanya

secara langsung kepada orang itu jika dia berfikir untuk menyakiti dirinya sendiri.

Orang itu sudah sakit dengan teruk sehingga segala-galanya di dalam batinnya hanya mahu menghentikan kesakitan, dan bunuh diri dianggap sebagai satu-satunya cara untuk melakukannya.

Apa yang perlu kita lakukan? Brooks menjelaskan: "Para pakar mengatakan jika anda mengenali seseorang yang tertekan, anda boleh bertanya secara langsung adakah dia berniat membunuh diri.

Pakar menekankan bahawa anda tidak akan mencetuskan keinginan itu pada orang tersebut.

Selalunya, niat itu sudah ada di fikirannya.

Dan jika ya, orang itu harus mendapat bantuan profesional.

Pakar juga bersetuju bahawa kita harus mengambil risiko dan bertanya kepada orang secara terbuka jika dia berfikir untuk membunuh diri.

Jika orang itu tidak berfikir tentang bunuh diri, dia akan memaafkan anda kerana bertanya; Tetapi jika dia berfikir untuk membunuh diri dan anda pula takut-takut atau segan untuk bertanya, sikap teragak-agak anda mungkin menghalang menyelamatkan nyawa orang itu.

Brooks menunjukkan bahawa walaupun semua kerja yang telah dilakukan dalam bidang perubatan dan psikologi dalam beberapa tahun kebelakangan ini, kadar bunuh

diri hari ini adalah 30 peratus lebih tinggi berbanding dua puluh tahun yang lalu dan satu daripada lima orang dewasa Amerika mengalami penyakit mental.

Kehidupan saya sendiri telah banyak dipengaruhi dengan kejadian bunuh diri, bunuh diri di kalangan saudara-mara, rakan-rakan, jiran, rakan sekerja, rakan sekelas, bekas pelajar, dan mentor yang dipercayai.

Dalam pengalaman saya, dalam setiap kematian seperti ini, orang yang mati adalah jiwa yang baik, jujur, lembut, sensitif, dan terlalu sensitif yang, pada satu ketika dalam hidupnya, terlalu terluka, terlalu penuh dengan kesakitan, dan terlalu dibaluti oleh penyakit sehingga tidak kuat untuk terus hidup.

Setiap kematian disebabkan bunuh diri meninggalkan kesedihan tragis yang diburukkan lagi oleh kurangnya pemahaman kita tentang apa yang sebenarnya menyebabkan kematian orang yang memilih kematian seperti itu.

Dalam penilaiannya terhadap bunuh diri rakannya, Brooks mengatakan bahawa pada akhirnya "binatang buas itu lebih besar daripada Pete, ia lebih besar dari yang kita jangkakan."

Dan "binatang buas" ini tidak pupus. Ringkasnya, kita masih jauh dari memahami kesihatan mental dan kerapuhannya. — *Hakcipta Terpelihara 1999-2023 @ Fr Ron Rolheiser*

## Bangkit dalam iman, perbuatan dan kasih

Dalam dua minggu terakhir ini kita telah mendengar Yesus memberi beberapa pernyataan yang bukan hanya sungguh menakutkan tetapi juga mengejutkan. Yesus berkata, "Akulah air yang hidup..., Akulah cahaya dunia."

Pada hari ini pula kita mendengar Yesus membuat satu lagi pernyataan yang tegas, "Akulah kebangkitan dan kehidupan."

Kenyataan Yesus yang tegas tersebut sebenarnya sangat relevan dengan kita pada hari ini sama seperti yang dialami oleh Maria dan Martha di dalam Injil tadi, sebab akibat kematian pada zaman Maria dan Martha sama sahaja dengan zaman kita sekarang.

Misalnya kita sendiri menyaksikan saudara kita yang tersayang meninggal dunia kerana menghadapi pelbagai jenis penyakit atau kerana kecelakaan jalan raya.

Pada ketika ini pula kita selalu mendengar ramai orang di luar negara meninggal akibat peperangan, keganasan dan bencana alam. Ketika ini pun kita mengalami bentuk kematian yang berlainan apabila kita melihat perkahwinan diakhiri dengan perceraian.

Demikian pun kita merasakan suatu bentuk kematian apabila kita

diputuskan hubungan kerja oleh majikan kita atas alasan pengurangan pekerja atau mengalami kerugian dalam pelaburan dan perniagaan yang kita ceburi.

Di dalam semua keadaan yang mematikan ini, rupanya kita pun sungguh perlu mendengar dan percaya bahawa Yesus adalah sesungguhnya kebangkitan dan kehidupan.

Oleh kerana kita mengalami pelbagai bentuk kematian, maka tidak hairanlah kita selalu bertanya, apakah hidup ini mempunyai maksudnya, atau hanya suatu keberadaan yang sia-sia?

Apakah kita mempunyai destinasi yang gilang gemilang atautah hidup ini hanya suatu petualangan yang hampa?

Kesemua persoalan hidup dan kematian kita ini mendapat jawabannya di dalam Injil hari ini.

Yesus memberi jawaban kurang lebih demikian, "Kamu merasa sangsi bahawa walau bagaimanapun juga kehidupan perlu diteruskan dan bahawa kematian bukanlah sesuatu pengakhiran hidup. Aku datang untuk memberitahu bahawa prasangka kamu itu memang betul."

Seperti Lazarus, kamu pun akan bangkit dari kematian. Gerak hati

kamu mengatakan bahawa betapa pun singkatnya kehidupan ini namun ianya tetap bermakna dan bernilai. Maka Aku datang untuk memberitahu bahawa gerak hati kamu itupun memang betul. Jadi jika kamu mempunyai iman seperti Martha dan Maria, kamu akan melihat kemuliaan Tuhan."

Berbalik kita pada kisah mengenai keakraban Yesus dengan Martha, Maria dan Lazarus dalam Injil tadi.

Apabila Lazarus meninggal dunia, Yesus menangisinya sehingga orang-orang berkata, "Lihatlah betapa kasih-Nya kepadanya." (ay 36). Tetapi Yesus tidak hanya menangisinya sahaja tetapi Dia melakukan sesuatu yang positif, iaitu dengan membangkitkan Lazarus.

Sebagai pengikut Yesus yang baik, apakah kita mempunyai sikap yang sama dengan-Nya? Sikap yang mahu membantu, mahu bertanggung jawab sosial dengan sesama yang sungguh memerlukan. Tauladan yang diperlihatkan oleh Yesus kepada kita hari ini menjelaskan bahawa berdoa sahaja itu belum cukup.

Kita perlu membantu sesama kita agar bangkit dari 'alam kematian' kerana mengalami pelbagai masalah kehidupan. Memang kita

**HARI MINGGU KELIMA  
PRA-PASKAH TAHUN A**

**YEHEZKIEL 37:12-14;**

**ROMA 8:8-11;**

**INJIL YOHANES 11:1-45**

tidak dapat menandingi Yesus, namun dalam hal-hal tertentu sesuai dengan bakat kita, pasti kita pun boleh melakukan sesuatu yang dapat menampakkan kasih Yesus yang membahagiakan itu kepada sesama kita.

Misalnya kita memberi pekerjaan, bantuan kewangan kepada murid-murid sekolah yang kurang mampu, memberi tempat tinggal pada orang-orang yang susah terutama warga tua yang dipinggirkan.

Juga bagi mereka yang mengalami krisis rumah tangga atau pelbagai krisis kehidupan yang membuat mereka cemas dan kebingungan.

Kita boleh menjadi pelindung yang baik dan boleh dipercayai oleh mereka tanpa banyak memberi nasihat.

Dengan berbuat demikian, diharapkan agar kita dapat menyalurkan kuasa kebangkitan Yesus

itu agar mereka bangkit dan mulakan kembali hidup mereka.

Bagi diri kita masing-masing, hendaknya kita meneguhkan iman kita bahawa walau apa pun yang terjadi, baik atau buruk kehidupan yang kita alami, namun bersama dengan nabi Yehezkiel dalam bacaan pertama tadi, kita tetap percaya bahawa Tuhan pasti memberi harapan baru dan kehidupan baru.

Betapa pun sedihnya kehidupan kita, namun bersama dengan St Paulus, kita tetap percaya bahawa Yesus pasti membangkitkan kita.

Betapa pun hebatnya kemusnahan akibat daripada kematian orang-orang yang tersayang, namun bersama Martha dan Maria, kita melakukan lonjakan iman dan berseru, "Ya Tuhan, aku percaya, bahawa Engkau adalah Mesias, Anak Tuhan... Engkau adalah kebangkitan dan kehidupan" (ay.27). — *santapan rohani*

# Sambutan Hari Tentera Darat ke-90 di Kem Terendak

KEM TERENDAK: Para pejuang tanah air beragama Kristian merayakan Hari Tentera Darat ke-90 dengan Misa Kudus pada Mac 5 lalu di Chapel Corpus Christi, Kem Terendak.

Uskup Bernard Paul, yang memimpin perayaan Ekaristi mengatakan Gereja amat menghargai serta menghormati tugas angkatan tentera yang mempertahankan negara.

Selebrasi bersama dalam Misa hari itu ialah Fr Clarence Motoyou, Fr John Yeow dan Diakon Anthony Chua.

Sambutan Hari Tentera ke-90 tahun ini masih mengekalkan tema “Kesejahteraan Keluarga Tentera Darat Diutamakan, Kedaulatan Negara Terjamin.”

Dalam homilinya, Bapa Uskup mengatakan bahawa kita perlu mendengar Satu Suara yang menghidupkan, membimbing dan memberkati kita iaitu suara Tuhan.

Setiap hari kita terdedah dengan banyak suara yang mempengaruhi kita.

Katanya, “Manusia boleh bercakap dalam



Uskup Bernard Paul, para paderi dan religius bersama anggota tentera darat.

tujuh ribu perkataan, mendengar 20 hingga 30 ribu perkataan setiap hari. Tetapi ada Satu Suara yang kita perlu dengar, yang memberi kita kehidupan, panduan, penghiburan, pengampunan iaitu suara Tuhan.”

Merujuk kepada pembacaan Injil pada hari itu, beliau mengajak umat untuk

menghadapi pelbagai cabaran hidup dengan mendengar suara Sang Gembala Baik melalui firman-Nya khususnya ketika diuji untuk taat kepada suara Tuhan, bagaimana meninggalkan zon selesa seperti Abraham, cabaran melawan kesangsian dalam mengikuti Yesus dan cabaran mempraktikkan sab-

da Tuhan di tengah-tengah arus kemodenan hidup.

Selepas Misa, sambutan Hari Tentera Darat ini dimeriahkan dengan upacara memotong kek bersama Bapa Uskup dan Mejar Dennis Liew Jia Yi. — *Styvester Bresl*

## Anggota KED diseru promosi firman Tuhan, menjadi garam dan terang dunia

MELAKA: Pelayanan KED (Komuniti Eklestial Dasar) Bahasa Vikariat Melaka telah mengadakan bengkel yang bertema, “Garam dan Terang Dunia: Persekutuan, Penyertaan dan Misi” pada Februari 25, di Gereja Our Lady of Guadalupe Krubong, yang disertai 34 orang pemimpin KED.

Ia dimulakan dengan Misa Kudus yang dipimpin oleh Fr Neville Arul Sinnappah. Sesi-sesi dalam bengkel ini dikendalikan oleh Sr Magdalena Kopong FSIC (Sr Mag).

Sr Mag menyampaikan tiga sesi iaitu “Panggilan Tuhan bagi Gereja-Nya melalui KED”, “Berjalan bersama sebagai garam dan terang dunia” dan untuk sesi ketiga, di-

adakan perbincangan dalam kumpulan.

Dalam sesi-sesi tersebut, para pemimpin KED dijelaskan sejarah bermulanya KED seperti yang tercatat dalam Kitab Suci dan kepentingannya dalam membantu penghayatan Firman Tuhan serta bagaimana KED dapat membantu keuskupan untuk bertumbuh dalam iman.

Melalui sesi ketiga iaitu perkongsian dalam kumpulan, para peserta menggunakan bahan-bahan renungan, bagi membantu mereka untuk berkongsi pengalaman dan merenung peranan mereka dalam KED sebagai umat yang dibaptis. Aktiviti dalam kumpulan ini juga membantu para



Para peserta bengkel KED bersama Sr Mag dan Sr Liza Angie FSIC.

peserta bagaimana mengadakan aktiviti dan bagaimana menghidupkan Sabda Tuhan dalam KED.

Selepas bengkel, para peserta mengun-

kapkan kesyukuran mereka kerana memperoleh pengetahuan mendalam peranan KED sebagai salah satu cara menggereja.

— *Noni Jemis*

### Tanya Jawab



Adakah anda mempunyai persoalan agama, Kitab Suci atau ajaran Gereja?

Hantarkan soalan anda ke:

HERALD  
5, Jalan Robertson,  
50150 Kuala Lumpur

Tel: 03-2026 8291

Email:  
liza@herald.com.my

## Apakah segala sesuatu sudah diatur oleh Tuhan?

**Pertanyaan:** Apakah segala sesuatu yang terjadi dalam hidup kita sudah ditentukan oleh Tuhan? — yang ingin pencerahan

**Jawaban:** Semasa berdoa di Taman Getsemani, Yesus mengatakan, “...Janganlah seperti yang Ku kehendaki, melainkan seperti yang Engkau kehendaki” (Mat. 26:39).

Ungkapan tersebut menunjukkan adanya pergelutan dalam kemanusiaan Yesus, namun Dia tetap memilih kehendak Tuhan, kenyataan Ilahi dalam diri-Nya.

Pergelutan seperti itu dialami oleh setiap orang, sebagaimana Paulus menggambarkan dirinya selalu melakukan yang bukan direncananya (Lih. Roma 7:15-19).

Dalam diri kita ada duri dalam diri kita yang membuatkan kita bergelut untuk memilih kehendak daging atau Tuhan (2 Kor. 12:7; Ef 2:3).

Sebagai manusia, memang sukar membezakan kehendak Tuhan dengan kehendak diri. Itulah pergelutan diri kita seumur hidup. Manusia adalah citra Tuhan, diciptakan menurut gambar dan rupa Tuhan (Lih. Kej. 1:27), namun rahmat kebebasan yang dianugerahkan Tuhan menjadikan kita menyalahgunakan kebebasan tersebut. Manusia menggunakan kebebasannya secara buruk.

Di dalam sejarah Gereja, pernah ada perdebatan tentang “pre-destinasi” yang mengatakan segala-galanya telah diatur serta dikehendaki

oleh Tuhan.

Pandangan ini bagaimana pun dihadapkan dengan pemahaman akan kehendak bebas, yang diberikan kepada manusia.

Perdebatan dua hal ini sudah berlangsung lama, sejak di awal keberadaan Gereja.

Santo Augustinus cukup banyak berbicara tentang perkara ini, dan memberi pengaruh dalam ajaran Gereja akan hal ini.

Katekismus Gereja Katolik kemudian mengambarkannya demikian, “Kalau Dia telah ‘menentukan’ sesuatu sebelumnya dalam rencananya yang abadi, Dia turut memperhitungkan juga jawaban setiap orang atas rahmat-Nya” (KGK 600).

Kehendak Tuhan adalah keselamatan, agar setiap orang memperoleh kehidupan kekal (Lih. Yoh. 6:39-40).

Yang sejak semula ditentukan Tuhan adalah untuk menjadi serupa dengan gambaran Putera-Nya, dan itu merupakan jalan pemuliaan (Lih. Roma 8:29-30).

Dari sini kita boleh membayangkan bahawa Tuhan tidak menghendaki celaka, apalagi kehancuran.

Oleh itu, kita perlu senantiasa diperdamaikan dengan Kristus, diperbaharui oleh-Nya, agar martabat hidup kita dipulihkan. Tuhan menghendaki keselamatan bagi semua.

Bila ada sesuatu yang tidak sesuai terjadi dalam hidup kita, ia adalah akibat dari penyalah-

gunaan kebebasan manusia. Hidup kita dalam dunia ini rapuh, mudah retak, maka kita perlu menjaganya agar tidak jatuh dan patah (Lih. 2 Kor. 4:7).

Kisah pengkhianatan Yudas boleh kita pakai sebagai contoh, Tuhan memberi kesempatan, namun dia mensia-siakkannya, memilih pergi daripada Tuhan dan Tuhan mempersilakan dia menjalankan rencananya sendiri (Lih. Yoh. 13:27).

Apakah setiap bencana alam sudah ditentukan oleh Tuhan? Ini adalah pandangan melampau. Kita telah diberikan tugas untuk menghindari serta meminimalkan kesan kerosakan bumi.

Kitalah yang harus menggunakan kebebasan serta akal budi kita secara benar dan bertanggungjawab.

Melemparkan semuanya kepada kehendak Tuhan, hanyalah sikap mahu lari dari tanggungjawab dan kedewasaan iman

Maka, kita perlu mendalami Kitab Suci dan ajaran Gereja, agar kita terbantu menegaskan kehendak Tuhan, dan mewaspadaikan setiap kehendak dan kepentingan diri.

Paulus membantu kita dengan kriteria menilai apa yang mendorong sikap dan tindakan kita, apakah ia dari Roh atau dari kedagingan? (Lih. Gal. 5:16-26; Rom. 8:1-17).

Buah nyata dari kehendak Tuhan, akhirnya adalah kasih (Lih. Yoh. 15:1-17; 1 Yoh. 4:7-21).

— *Fr T. Krispurwana Cahyadi, SJ, hidupkatolik.com*

# Sahabat kecil Yesus

Hello adik-adik,

Apa khabar? Pada hari ini, dalam pembacaan Injil, kita mendengar Yesus, yang amat sedih ketika mendapat khabar bahawa rakan yang dikasihinya Lazarus, telah meninggal dunia.

Yesus segera ke kota Betania dan Yesus menangis di hadapan kubur Lazarus.

Namun berita baiknya ialah, Yesus tidak setakat menangis sebaliknya membangkitkan Lazarus.

Peristiwa Lazarus dibangkitkan

oleh Yesus meneguhkan iman kita bahawa Yesus adalah Jalan dan Kehidupan.

Adik-adik, seperti Lazarus, kita juga harus bangkit dari pelbagai tingkah laku kita yang tidak baik.

Misalnya, kalau dahulu, kita lebih suka bermain game dalam


telefon bimbit, kurangilah bermain dan lebihkan bersama keluarga.

Semoga kita semua dapat bangkit dari pelbagai sikap buruk kita dengan meneladani Yesus.

Salam Sayang  
Antie Melly



Lazarus  
Yesus  
Marta  
Maria  
Yudea  
terang  
tersungkur  
syurga



Yesus mendengar sahabatnya Lazarus telah meninggal dunia. Dia mahu mengunjungi kubur Lazarus. Bantu Yesus untuk ke kubur Lazarus agar Dia dapat membangkitkan Lazarus dari kematian.

CARI PERKATAAN TERSEMBUNYI

Jawab Yesus: "Akulah kebangkitan dan hidup; sesiapa percaya kepada-Ku, dia akan hidup walaupun dia sudah mati." (Yoh 11:25).



Cari TIGA BELAS perbezaan pada gambar di atas. Jangan lupa mewarnakannya.

# BELIA MILENIUM



## Kaum muda Zon Minawo, Magatang diutus jadi saksi sukacita Injil



KENINGAU: “Bangkitlah Aku Mengutus Kamu Sebagai Saksi Dengan Apa Yang Kamu Lihat” (Kis 26:16) demikian tema Kem Belia Zon kali keenam (KBZ-6) yang menggabungkan para belia dari Zon Magatang dan Minawo.

Berdasarkan tema itu, Uskup Cornelius menyeru para belia bahawa mereka diutus sebagai saksi-saksi Kristus dan membawa pengaruh yang baik untuk semua orang yang kita temui.

KBZ-6 diadakan di Zon Magatang pada awal Mac lalu, disertai lebih 150 orang belia dari zon Magatang dan Minawo serta beberapa zon lain seperti Apin-Apin, Bingkor, Senagang dan Kepingan.

Misa Kudus Pembukaan KBZ-6 telah dipimpin oleh Msgr Gilbert Lasius.

Vikaris Jeneral Keuskupan Keningau itu mengucapkan tahniah atas inisiatif para belia untuk kembali dan bersemangat menyertai program belia selepas pandemik.

Beliau juga menggesa para peserta untuk menggunakan ilmu dan pengalaman mereka dalam kem tersebut sebagai penegasan iman dan dorongan menjadi garam serta terang dunia.

Program yang berjalan selama empat hari tiga malam itu membawa kaum muda melihat kembali relasi peribadi mereka dengan Tuhan, dalam keluar-

ga, sesama dan alam sekitar.

Manakala, pada Mac 1, 2023, KBZ-6 diakhiri dengan perayaan Ekaristi yang dipimpin oleh Uskup Cornelius Piong di gereja St Blasiur, Magatang.

“Iman kita bukanlah untuk disimpan tetapi kita perlu bersaksi, menjadi garam dan cahaya bagi sesama,” kata Bapa Uskup kepada para peserta KBZ-6.

“Para belia, ingatlah bahawa hidup kita ini tidak berakhir di dunia sahaja, tapi tujuan hidup kita adalah menuju ke rumah Bapa di Syurga,” kata Uskup Cornelius.

“Oleh itu, kita perlulah menjalinkan

kesatuan yang erat dengan Yesus, kerana hanya melalui Dialah kita boleh sampai ke rumah Bapa di Syurga, seperti dalam (Yohanes 14:6) “Akulah jalan kebenaran, dan hidup; tidak ada manusia yang datang kepada Bapa tanpa melalui Aku”.

Florence Doon dan Fevian Felix selaku Pengerusi KBK bagi Zon Magatang dan Minawo, yang juga merupakan koordinator bagi KBZ-6 ini mengungkapkan rasa syukur dan terima kasih atas sokongan dan kerjasama dari semua pihak yang terlibat dalam menjayakan kem tersebut. — **Melissa Floly**

*Iman bukan untuk disimpan tetapi kita perlu bersaksi - pesan Uskup Cornelius Piong kepada para peserta KBZ-6.*

## Belia Vikariat Melaka fahami kesejatan tubuh melalui Seminar Teologi Tubuh

MELAKA: Belajar teologi tubuh adalah pilihan tepat sebagai penghargaan kepada ke-  
luruhan martabat manusia.

Pada Mac 4-5, 2023, Pelayanan Belia Bahasa Malaysia Vikariat Melaka telah menganjurkan seminar “Teologi Tubuh” di dewan Gereja Our Lady of Guadalupe Krubong, Melaka yang disertai 45 orang peserta.

Sesi-sesi disampaikan oleh Sr Maria Magdalena Kopong FSIC (Sr Mag) dan Sr Shanti Mariadass FdCC.

Sr Mag yang menyampaikan tiga sesi menekankan kepada belia akan pentingnya menghargai, menyayangi tubuh sendiri dan mampu menerima diri sendiri.

Beliau memberikan contoh teladan suci daripada tujuh orang kudus dan membimbing para belia melalui kumpulan perbincangan bagi mempelajari kemurnian tubuh.



*Para peserta seminar Teologi Tubuh bersama Sr Mag dan Sr Liza FSIC.*

Pada hari kedua, bersama Sr Shanti, para belia dibawa untuk melihat panggilan hidup dan menekankan betapa pentingnya mengikuti teladan Yesus yang menikah dengan gereja.

Para belia juga telah dibahagikan kepada

beberapa kumpulan untuk membincangkan beberapa topik yang diberikan oleh Sr Shanti. Melalui perbincangan kumpulan ini, peserta berpeluang mengongsikan pendapat dan pengalaman mereka.

Para peserta berasa gembira dapat

berkumpul bersama secara bersemuka dalam program seperti ini, dan mereka mengharap program seperti ini akan diadakan lagi pada masa datang.

Emily Gregory, salah seorang peserta mengatakan melalui seminar Teologi Tubuh, “Saya dapat mempelajari tentang perbatasan antara lelaki dan perempuan yang dipandang remeh oleh remaja atau orang-orang zaman sekarang.

Saya juga memahami perkahwinan yang diterima oleh Gereja ialah antara lelaki dan wanita serta mengapa Gereja menolak perkahwinan sejenis.

Emily juga menjadikan Santa Perawan Maria sebagai teladan Teologi Tubuh di mana perawan itu menjaga kemurnian tubuhnya sehinggalah diangkat ke syurga. — **Rowena Rodney**

# Unsur-unsur liturgi harus perkuat rasa persekutuan

TAKHTA SUCI: Elemen estetika dan artistik yang menyokong liturgi harus lebih memperkuat doa dan rasa persekutuan, kata Sri Paus Fransiskus.

“Ruang, cahaya, akustik, warna, gambar, simbol (dan) perlengkapan liturgis merupakan elemen dasar dari realiti, peristiwa, manusiawi dan ilahi.

“Pada masa yang sama, merupakan sebuah liturgi yang baik,” demikian kata Bapa Suci dalam pesan bertulisnya kepada anggota akademi kepausan.

Pesan itu disampaikan kepada Kardinal José Tolentino de Mendonça, Prefek Dikasteri Kebudayaan dan Pendidikan serta ketua dewan koordinasi akademi kepausan,

yang didirikan oleh Sto Yohanes Paulus II.

Pesan itu dibacakan oleh Kardinal Pietro Parolin, setiausaha Negara Vatikan, semasa sesi publik akademi ke-26, yang diselenggarakan oleh Akademi Seni Rupa Keapausan pada Mac 14. Bapa Suci mengatakan dalam pesannya, “Kita tahu betapa pentingnya pengaturan liturgi dalam memperkuat doa dan rasa persekutuan.”

Masalah arkitektur dan ruang sakral “menjadi signifikan dan tepat waktu seperti sebelumnya, kerana akan selalu ada perdebatan bahkan kontroversi tentang proposal pembauran arkitektur sakral, yang memerlukan pemerhatian teliti untuk dicipta, terutama di kawasan baru

sama ada di pinggir kota mahupun di kota-kota kecil, ruang yang memadai di mana komuniti Kristian dapat merayakan liturgi kudus dengan bermartabat sesuai ajaran Konsili Vatikan II,” tulisnya.

Beliau merujuk pada surat apostolik tahun 2022, “*Desiderio Desideravi*” (“Saya sungguh-sungguh menginginkan”), yang menegaskan umat Katolik perlu lebih memahami reformasi liturgi Konsili Vatikan II, kekuatan serta keindahan Misa.

Bapa Suci menekankan pentingnya liturgi dan tidak kehilangan harapan dalam membantu orang untuk menyedari serta memahami bahasa simbolik ini.

Aspek penting lainnya, ialah in-



Sri Paus Fransiskus memimpin audiensi umum minggunya di Dataran Sto Petrus Vatikan pada Mac 15. (Gambar/Media Vatikan)

spirasi kreativiti seni dan arkitektur berasal dari visi Kristian yang mengalir “dari kehidupan liturgi,

dari tindakan Roh dan bukan dari subjektif manusia saja.” — *media Vatikan*

## Kristian-Muslim harus jadi saksi damai di dunia yang dilanda perang

ROMA: Sri Paus Fransiskus mengirim surat kepada Ayatollah Agung Ali al-Sistani, pemimpin spiritual Syiah Irak di mana Bapa Suci mengenang semula pertemuan damai mereka dua tahun lalu, semasa kunjungan apostolik Bapa Suci ke Irak.

Berbicara kepada Ayatollah Agung al-Sistani sebagai “saudara tersayang”, Sri Paus Fransiskus menyatakan bahawa adalah tugas para pemimpin agama dari semua agama untuk mendorong mereka yang memiliki tanggung jawab dalam masyarakat sivil bagi mempromosi tindakan politik yang melindungi hak-hak dasar setiap orang dan mempromosikan persaudaraan sebagai jawapan konkrit terhadap cabaran masa kini.

Dalam surat itu juga, Bapa Suci mengenang pertemuan mereka dua tahun lalu di Najaf yang menggambarkan sebagai “tonggak sejarah di jalur dialog antara agama dan pemahaman antara manusia.”

Kesempatan itu diberikan melalui konferensi yang berlangsung di Najaf bertema “Katolik dan Syiah menghadapi masa depan. Dalam rangka peringatan dua ta-



Pertemuan Sri Paus Fransiskus dan Ayatollah Agung Sayyid Ali Al-Husayni Al-Sistani di Irak pada Mac 2021.

hun kunjungan Sri Paus Fransiskus ke Irak.”

Acara tersebut, yang dianjurkan oleh Komuniti Sant’Egidio dan Institut Najaf Al Khoei, dihadiri oleh delegasi dari Sant’Egidio serta Uskup Agung Vincenzo Paglia, Kardinal Ayuso, Coutts dan Louis Sako, Patriark Kasdim Baghdad.

Dalam surat yang diterbitkan pada Mac 14, oleh Jabatan Akhbar Takhta Suci, Sri Paus memuji Ayatollah Agung atas “komitmennya kepada mereka yang menderita penganiayaan, menjaga kesucian hidup dan pentingnya persatuan rakyat Irak.”

“Kolaborasi dan persahabatan

antara pemeluk agama yang berbeza sangat diperlukan, tidak hanya rasa saling menghargai tetapi juga kerukunan yang membawa kebaikan kepada umat manusia, seperti yang diajarkan sejarah Irak baru-baru ini kepada kita,” kata Sri Paus.

Bapa Suci mengungkapkan keyakinannya bahawa komuniti berbasis agama harus menjadi “tempat persekutuan yang istimewa dan simbol hidup berdampingan secara damai, di mana kita memohon kepada Pencipta segalanya, untuk masa depan persatuan di bumi.” — *media Vatikan*

## Sekat dana senjata junta di Myanmar

YANGON: Ketika laporan tentang konflik di Myanmar sedang dibentangkan di Dewan Keamanan PBB ribuan penduduk desa, termasuk umat Katolik, telah meninggalkan rumah mereka disebabkan militer Myanmar meningkatkan serangan mereka.

Terbaru, pergolakan antara tentera dan kumpulan penunjuk perasaan, termasuk umat Kristian, telah menyebabkan ribuan penduduk desa di Kotapraja Demoso, Kayah yang majoritinya beragama Kristian terpaksa melarikan diri, berlindung di rumah saudara mara mereka dan di hutan.

Lebih 3,000 orang telah meninggalkan rumah mereka sejak pertempuran Mac 10 itu.

Sementara itu, untuk pertama kalinya pada Disember tahun lalu, Dewan Keamanan PBB melalui resolusi meminta militer mengakhiri kekerasan dan mengizinkan bantuan kemanusiaan tanpa halangan.

Pada Mac 13, Dewan Keamanan PBB mengadakan sesi tentang Myanmar untuk mendengarkan laporan dari Noeleen Heyzer, utusan khusus setiausaha agung PBB untuk Myanmar, dan Retno Marsudi, menteri luar negeri Indonesia dan ketua jabatan khusus Perhimpunan Bangsa-Bangsa Asia Tenggara (ASEAN).



Sebuah Gereja yang dibakar oleh militer Myanmar di Kayah. Gambar: UCA News.

Louis Charbonneau, direktor PBB di *Human Rights Watch*, mengatakan, “Utusan khusus PBB dan menteri luar negeri Indonesia harus menjelaskan kepada anggota Dewan Keamanan bahawa pembunuhan, penyiksaan, penangkapan ilegal dan kejahatan perang yang dilakukan junta menuntut tindakan yang lebih konkrit.”

“Menyekat aliran dana wang dan senjata junta adalah langkah yang seharusnya diambil pada ketika ini,” ujar Charbonneau dalam sebuah pernyataan pada Mac 13. — *ucanews.com*

## Peranan penting agama dalam memupuk persaudaraan



Bapa Suci Fransiskus bertemu dengan United Association of Humanistic Buddhism dari Taiwan di Vatikan. Gambar: Media Vatikan.

ROMA: Pada masa yang ditandai dengan “perubahan pantas yang mempengaruhi manusia dan planet ini”, para agamawan dipanggil untuk lebih aktif dalam memupuk persaudaraan dengan mempromosikan “budaya pertemuan”, terutama di kalangan golongan muda.

Bapa Suci Fransiskus mengesahkan perkara ini pada Mac 16 lalu semasa bertemu dengan delegasi Persatuan Buddha Humanistik Taiwan yang dalam lawatan ke Roma bagi “ziarah pendidikan” antara agama.

Dalam ucapannya kepada para sami. Sri Paus menyatakan lawatan mereka adalah “peristiwa is-

timewa” yang dapat memajukan budaya pertemuan, “di mana kita mengambil risiko membuka diri kita kepada orang lain, mempercayai bahawa kita akan menemui mereka kawan dan saudara dan saudari, dan dalam proses belajar dan mengetahui lebih lanjut mengenai diri kita sendiri.”

“Ziarah pendidikan antara agama,” kata Sri Paus, “boleh menjadi sumber pengayaan yang hebat, menawarkan pelbagai peluang untuk kita bertemu antara satu sama lain, belajar antara satu sama lain dan menghargai pelbagai pengalaman kita.”

Sri Paus Fransiskus selanjutnya

menyatakan bahawa ziarah pendidikan ke tempat-tempat suci agama seperti yang dilakukan oleh delegasi Buddha, “juga dapat memperkayakan penghargaan kita terhadap keunikan pendekatannya terhadap ilahi.”

Pada akhir pertemuan itu, Sri Paus Fransiskus menyatakan harapannya agar ziarah para agamawan Buddha itu dapat membawa kepada pertemuan yang lebih mendalam dengan penganut Kristian, dan memelihara keindahan bumi, serta menawarkan “peluang berharga untuk pertumbuhan pengetahuan, kebijaksanaan, dialog dan pemahaman”. — *media Vatikan*

# Perjalanan 40 hari Pra-Paskah

## Minggu Kelima Pra-Paskah ...

TARIKH	RENUNGAN	AKTIVITI
HARI MINGGU PRA-PASKAH V Mac 26, 2023  <i>Yeh 37:12-14</i> <i>Rom 8:8-11</i> <i>Yoh 11:1-45</i>	Kisah Lazarus yang dibangkitkan dari mati dalam Injil hari ini menegaskan kepada kita bahawa Yesus sudah menebus kita dari kekuasaan maut dari kematian menuju keselamatan. Manusia tidak lagi akan dikuasai maut kecuali kita membiarkannya dan tidak mengikuti bimbingan Tuhan.	<i>Log out dari Netflix, Viu, Youtube...</i> luangkan masa bersama keluarga.
Mac 27, 2023 (Isnin)  <i>Dan 13: 41c - 62</i> <i>Yoh 8: 1-11</i>	Hari ini, Yesus mengajar kita untuk tidak mudah terbawa arus mengadili sesama tanpa mengetahui atau menyelidik penyebabnya. Yesus tidak membenarkan perbuatan ini dilakukan terhadap seorang perempuan yang kedapatan berzina iaitu peringatan kepada kita agar mengadili atau menyelidik dengan adil dan berbelas kasihan.	Jika membeli belah hari ini, bawa beg <i>shopping</i> sendiri. Elak penggunaan bakul plastik, <i>straw</i> atau sebarang bahan plastik sekali guna.
Mac 28, 2023 (Selasa)  <i>Bil 21: 4-9</i> <i>Yoh 8: 21-30</i>	Tuhan mengingatkan kita dan memberi tanda melalui kedua-dua pembacaan hari ini bahawa kesembuhan hanya berasal daripada-Nya dan penebusan kita atas kuasa maut hanya terlaksana dalam Tuhan Yesus Kristus, Sang Juruselamat kita.	Berdoa Ibadat Harian bersama KED/KKD.
Mac 29, 2023 (Rabu)  <i>Dan 3:14-20, 24-25,28</i> <i>Yoh 8: 31-42</i>	Tidak mudah bagi kita, pada saat ini, untuk setia dalam iman. Namun, bersama Yesus Kristus, Dia selalu berjalan bersama kita. Mari memilih jalan Yesus iaitu Jalan Kehidupan dan Kebenaran.	Kongsikan petikan Alkitab yang menyentuh hati anda kepada rakan-rakan/ <i>group online</i> .
Mac 30, 2023 (Khamis)  <i>Kej 17: 3-9</i> <i>Yoh 8: 51-59</i>	Kita diajak untuk berani memilih mana yang benar, meskipun ia tidak popular dan bukan pilihan kita. Yesus mengajak kita untuk perubahan sejati dan berani mengaakan "ya" untuk menjadi murid-Nya.	Derma sekurang-kurangnya tiga barangan peribadi anda bagi mereka yang memerlukan.
31 Mac, 2023 (Jumaat)  <i>Yer 20:10-13</i> <i>Yoh 10: 31-42</i>	Yeremia sering diumpat dan dijatuhkan oleh orang-orang terdekatnya. Tetapi dia tetap setia dan berandal kepada Tuhan yang memampukan dia untuk terus berkarya. Semoga iman kita juga sungguh kredibel seperti Yeremia.	Berbuallah (secara fizikal atau maya) dengan seseorang yang telah lama tidak dihubungi.
April 1, 2023 (Sabtu)  <i>Yeh 37: 21-28</i> <i>Yoh 11: 45-56</i>	Dua nubuat Yehezkiel: Keselamatan akan datang bagi bangsa Israel dan pengorbanan adalah jalan untuk menyelamatkan ramai orang dari segala penderitaan. Melalui pengorbanan, kita sedang terarah dalam kebersatuan dengan Tuhan dan sesama.	Tulis surat untuk diri sendiri. Ungkapkan rasa syukur di atas berkat Tuhan selama ini.

● Lakukan renungan dan aktiviti bagi Hari Minggu Kelima Pra-Paskah, secara peribadi, bersama keluarga atau KKD/KED. Renungan Hari Minggu Palma dan Minggu Keenam Pra-Paskah akan disiarkan pada keluaran akan datang.

### MAKANAN UNTUK JIWA

## Inspirasi: moto hidup Ibu Teresa dari Calcuta

Seluruh dunia mengenal Ibu Teresa. Ia merupakan seorang biarawati Katolik Roma yang mengabdikan diri untuk orang sakit dan miskin di India.

Nama asalnya, Anjeze Gonxhe Bojaxhiu telah mengambil kursus perubatan demi melayani orang sakit dan miskin.

Meskipun dibalut dengan pelbagai halangan misalnya masalah kewangan dan bekalan ubat, dia tidak pernah berhenti.

Aksi kemanusiaannya begitu luhur, dan diiktiraf di 100 negara khususnya India. Berikut merupakan beberapa moto Ibu Teresa yang mampu menginspirasi kita:

1. Tidak semua dari kita dapat melakukan hal-hal besar. Tetapi kita dapat melakukan hal-hal kecil dengan penuh cinta
2. Damai dimulai dengan senyuman.
3. Adakah anda kenal siapa tetangga anda?
4. Orang yang memberi dengan senyuman adalah pemberi terbaik kerana Tuhan mengasihi orang yang memberi dengan sukacita.
5. Jika kita berdoa, kita akan percaya: jika kita percaya, kita akan mencintai; dan bila kita mencintai, kita akan melayani.
6. Kita merasa bahawa perbuatan kita hanyalah setitis air di samudera. Namun, samudera akan berkurang jika setitis air



tersebut tidak ada.

7. Cinta dan kasih sayang dimulai dari rumah, dan cinta bukanlah seberapa banyak yang kita perbuat, melainkan seberapa besar cinta yang kita berikan dalam perbuatan itu.
8. Setialah pada hal-hal yang kecil kerana di dalamnya terletak kekuatan kita.
9. Jika Anda menilai orang, anda tidak punya waktu untuk mencintai mereka.
10. Jangan biarkan setiap orang yang datang pada anda, pergi tanpa merasa lebih baik dan lebih bahagia.
11. Jadilah ungkapan hidup dari kebai-

kan Tuhan. Kebaikan dalam wajah anda, kebaikan dalam mata anda, kebaikan dalam senyum anda.

12. Aku dapat melakukan hal-hal yang anda tidak mampu, anda dapat melakukan hal-hal yang saya tidak mampu. Bersama-sama kita dapat melakukan hal yang besar.

13. Hidup tidak akan berharga jika tidak bermanfaat untuk orang lain.

14. Apa yang dapat anda lakukan untuk mempromosikan perdamaian dunia? Pulanglah dan cintai keluarga kita.

15. Kegembiraan adalah doa. Doa adalah kegembiraan.— *Aleteia*

### PENULIS BERKICAU

## Paderi wanita?

Jangan terkejut, jangan melatah dengan tajuk di atas. Tajuk ini bukan untuk mencetuskan kontroversi. Hanya komentar sederhana, pandangan saya, meskipun seorang wanita, tetapi saya sendiri kurang senang dengan idea pentahbisan diakon di kalangan wanita atau wanita menyampaikan homili semasa Misa Kudus apatah lagi paderi wanita.

Dan selepas ini, saya berharap, jika ada klerus atau ahli-ahli teologi yang ingin mencerahkan lagi perkara ini, silakan.

Soalan "mengapa wanita tidak boleh menjadi paderi, tidak boleh menyampaikan homili dalam Misa Kudus dan sebagainya" mungkin disebabkan ada beberapa wanita kudus dahulu, merupakan orang-orang penting dalam mengajar agama contohnya Phobe dalam surat Rasul Paulus.

Tetapi Rasul Paulus tidak menyatakan Phobe atau wanita mengajar dalam pertemuan-pertemuan ibadat (lih. 1 Kor 14:34), maksudnya di sini adalah menjalankan kuasa/ wewenang mengajar Gereja yang dikhususkan bagi para rasul dan para penerus mereka, yang adalah lelaki.

Memang ada juga argumen dan 'ajaran sesat' yang mengatakan Maria Magdalena seorang imam tetapi sumber ini bukanlah dokumen sah dari Vatikan.

Katekismus Gereja Katolik 1577 menyatakan, "Hanya pria [vir] yang sudah dibaptis, dapat menerima Tahbisan secara sah" (CIC, can. 1024). Yesus Tuhan telah memilih pria-pria [viri] untuk membentuk kelompok kedua belas Rasul (Bdk. Mrk 3:14-19; Luk 6:12-16), dan para Rasul pun melakukan yang sama, ketika mereka memilih rakan kerja (Bdk. 1 Tim 3:1-13; 2 Tim 1:6; Tit 1:5-9), yang akan menggantikan mereka dalam tugasnya (Bdk. Klemens dari Roma, Kor 42:4; 44:3).

Dewan para Uskup yang dengannya para imam bersatu dalam imamat, menghadirkan dewan kedua belas Rasul sampai Kristus datang kembali. Gereja menganggap diri terikat pada pilihan ini, yang telah dilakukan Tuhan sendiri. Kerana itu, tidak mungkin mentahbiskan wanita (Bdk. MD 26-27; CDF, Pernya. "Inter insigniores").

Pada Hari Wanita Sedunia, Mac 8, 2023 yang lalu, dalam sebuah bengkel, seorang wanita mempersoalkan adakah Gereja Katolik tidak mengakui peranan wanita?

Bagi saya, meskipun saya sendiri seorang wanita, saya menolak wanita menjadi paderi atau penyampai homili semasa Misa Kudus kerana wanita tidak dapat menjalankan peranan paderi 'in persona Christi', terutama pada saat mempersembahkan Misa Kudus.

Sebab di dalam perayaan Ekaristi, Kristus sebagai Mempelai Pria mempersembahkan Diri-Nya kepada Gereja yang adalah Mempelai wanita-Nya (lih. Ef 5:22-33).

Mari kita mengingati bahawa di antara semua orang kudus, para anggota Gereja, Bunda Maria memperoleh penghormatan tertinggi setelah Kristus, walaupun dia bukan paderi atau diakon.

Ini membuktikan bahawa bukan hanya lelaki yang dapat mengambil peranan penting dalam Gereja, kaum wanita juga dapat menyumbang dalam Gereja, hanya saja peranannya bukan sebagai paderi atau diakon.

### KENYATAAN MISI HERALD

HERALD adalah Minggu Katolik Gereja Malaysia. Ia berusaha untuk menyampaikan berita-berita terkini, nilai-nilai Kristian dan berusaha untuk berdialog dengan semua sektor masyarakat untuk membina komuniti beriman kepada Tuhan yang harmoni. Kami menyokong pembentukan Gereja dan menggalakkan umat awam dan religius untuk membuat keputusan moral di arena luar Gereja.

## Pembatalan dispensasi berkuat kuasa April 2, ini

KUALA LUMPUR: Konferensi Para Uskup Malaysia (CBCM), melalui surat pastoralnya bertarikh Mac 17, 2023 mengumumkan penarikan dispensasi dari mengikuti Misa Kudus dan pesta-pesta wajib.

Disebabkan pandemik covid-19, umat tidak dapat merayakan Ekaristi di Gereja sejak pertengahan Mac 2020.

Maka CBCM memutuskan untuk memberikan dispensasi atau pengecualian bagi umat dari disiplin iman.

Kini, setelah konsultasi dan penelitian, dan sebahagian besar sekatan pandemik telah dibatalkan, maka para Uskup Malaysia memutuskan untuk menarik dispensasi menghadiri Misa Kudus dan Hari-hari Wajib berkuat kuasa Hari Minggu Palma, April 2, 2023.

Berikut merupakan kenyataan penuh dari CBCM:

*Kasih karunia dan damai sejahtera dari Tuhan, Bapa kita, dan dari Tuhan Yesus Kristus (1 Kor 1:3)*

Sejak pertengahan Mac 2020, kebebasan kita untuk menghadiri Misa secara fizikal telah terganggu disebabkan pandemik COVID-19.

Merayakan Ekaristi sebagai komuniti di gereja-gereja tidak dapat dilakukan atas sebab-sebab di luar kawalan kita. Namun kita menemui cara untuk mendengar firman Tuhan di rumah dan melalui dunia digital. Kita dapat bersatu melalui doa peribadi dan keluarga.

Oleh kerana bahaya kepada kesihatan kita, mengikut Undang-Undang Kanonik (CIC) 87 §1 ia membolehkan Uskup diosis memberikan pengecualian umat beriman dari undang-undang disiplin, iaitu pengecualian dari kewajipan untuk menghadiri Misa pada hari Minggu dan pesta-

pesta wajib.

Pengecualian itu bermaksud untuk kelonggaran sementara demi kesihatan, keselamatan, dan kebaikan bersama. Setelah berunding dan meneliti, melihat bahawa sebahagian besar sekatan pandemik telah ditarik balik, dispensasi umum pada hari Minggu dan pesta-pesta wajib akan ditarik balik berkuat kuasa Hari Minggu Palma 2023.

Kita mengingatkan diri kita sekali lagi, "Hari Minggu, menurut tradisi apostolik, adalah hari dirayakannya misteri Paskah, maka harus dipertahankan sebagai hari raya wajib utama di seluruh Gereja. (CIC 1246 §1).

Seperti yang diperuntukkan dalam Undang-undang Kanonik Gereja, bagi mereka yang tidak dapat memenuhi kewajipan Hari Minggu dan Pesta-pesta Wajib atas sebab-sebab yang serius termasuk

kondisi kesihatan yang serius (contohnya, penyakit jantung, penyakit paru-paru kronik, penyakit buah pinggang, sistem imunisasi lemah dan bahaya-bahaya lain kepada kehidupan yang mungkin disebabkan oleh coronavirus), anda masih dapat berpegang kepada hari suci Tuhan dengan cara lain, "meluangkan waktu untuk berdoa selama waktu yang pantas sama ada secara peribadi atau sebagai keluarga" (CIC 1248 §2), ini mungkin termasuk mengambil bahagian dalam Misa Kudus dalam talian.

Kami dengan ini mengalu-alukan umat beriman untuk kembali beribadat secara fizikal merayakan Misa sambil mengingati "pada Hari Minggu dan hari-hari wajib, umat beriman berkewajipan untuk ambil bahagian dalam Misa." (Katekismus Gereja Katolik 2180; CIC 124Z).

+ Uskup Agung John Wong  
Uskup Agung Kota Kinabalu

+ Uskup Julius Gitom  
Uskup Sandakan

+ Uskup Cornelius Piong  
Uskup Keningau

+ Uskup Agung Julian Leow Beng Kim D.D.  
President, CBCM  
Uskup Agung Kuala Lumpur

+ Uskup Sebastian Francis  
Uskup Penang

+ Uskup Bernard Paul  
Uskup Malacca Johore

+ Uskup Agung Simon Poh  
Uskup Agung Kuching

+ Uskup Richard Ng  
Uskup Miri

+ Uskup Joseph Hii  
Uskup Sibul

### Misa Krisma Keuskupan Agung Kuala Lumpur

## Adakah kita paderi yang berbelas kasihan?

KUALA LUMPUR: Pada Misa Krisma, gembala Keuskupan Agung Kuala Lumpur bertanya kepada para paderi, "Adakah kita paderi yang berbelas kasihan? Adakah kita mendengar suara para umat?"

Uskup Agung Kuala Lumpur, Julian Leow memimpin Misa Krisma di Gereja Holy Redeemer Klang pada Mac 14 lalu. Turut membantunya di altar ialah Wakil Sri Paus ke Malaysia, Uskup Agung Wojciech Zaluski dan beberapa orang paderi Keuskupan.

Semasa menyampaikan homilinya, Uskup Agung Julian menggunakan dua petikan Kitab Suci

pada hari itu iaitu "Roh Tuhan ada padaku" dari kitab Yesaya dan sabda Yesus dalam Injil Lukas, "Kita diutus untuk membawa Khabar Gembira kepada Tuhan".

Kedua-dua kata itu membawa misi yang diamanahkan kepada para paderi, dan uskup, kata Uskup Agung Julian.

Prelatus itu juga mengenang tiga tahun semasa pandemik, di mana Gereja ditutup namun katanya, melalui semangat dan komitmen para paderi, mereka tetap keluar untuk memberikan pelayanan sakramen kepada mereka yang memerlukan, memberi harapan, mengunjungi orang sakit dan banyak lagi.

Beliau amat menghargai para paderi tersebut yang memberi peluang kepada umat, bertemu dan mengalami sentuhan Yesus.

Beliau meminta para kongregasi: "Doakanlah kami, berjalanlah bersama kami dalam pelayanan kami, dalam kelemahan kami, paderi bukanlah 'superman' kami ada kekurangan, terutamanya uskup anda," katanya dalam nada humor.

Prelatus itu juga mengatakan beliau terbuka menerima kritikan membina dalam membangun Keuskupan Agung Kuala Lumpur.

Sebelum Misa Krisma, terlebih dahulu para paderi menghadiri rekoleksi yang mengingatkan mereka



Uskup Agung Julian menghembus di atas bejana krisma, suatu gerakan yang melambangkan Roh Kudus turun ke atas minyak yang dikuduskan.

akan peranan mereka sebagai gembala umat.

Dan bagi Uskup Julian sendiri, beliau amat tersentuh dengan soalan renungan, "Adakah saya seorang paderi yang baik?"

Beliau mengakui, dia hanyalah manusia biasa yang mungkin telah banyak mengecewakan harapan orang lain dan memohon umat agar

tidak berhenti berdoa baginya dan bagi para paderi.

Selepas homili, para paderi memperbaharui komitmen imamat mereka di hadapan Uskup Agung.

Kemudian, tiga orang paderi, membawa minyak Katekumen, minyak untuk orang sakit dan minyak Krisma untuk diberkati oleh Uskup Agung.

## Para paderi Keuskupan Sandakan perbaharui janji imamat

SANDAKAN: "Kristus yang Terurapi, meskipun wafat di kayu salib demi menebus dosa-dosa kita, tetapi Dia tetap memilih kita untuk menjadi "minyak" suci-Nya," kata Uskup Julius Dusin Gitom semasa memimpin Misa Krisma, pada Mac 8 lalu di Katedral St Mary. Setelah dicabar oleh pandemik selama tiga tahun berturut-turut, akhirnya, dengan berkat Tuhan, Misa Krisma dirayakan secara fizikal, oleh Uskup Julius Dusin Gitom, bersama sembilan orang paderi keuskupan. Dalam homilinya, Uskup Julius menggambarkan kepent-

ingan minyak-minyak suci. Walaupun minyak, khususnya minyak zaitun mungkin kelihatan biasa dalam kehidupan seharian kita, namun setelah diberkati melalui kuasa Roh Kudus, ia berubah menjadi luar biasa. Minyak biasa itu, setelah diberkati menjadi Minyak Suci yang digunakan untuk pelayanan sakramen-sakramen, yang boleh ditakrifkan sebagai pertemuan antara kita dengan Tuhan, melalui Kristus. Kepada para paderi, Bapa Uskup mengingatkan mereka bahawa meskipun mereka diberkati un-



tuk melayani para umat, "Namun kita juga disuburkan melalui pelayanan kita kepada umat.

Pembaruan janji imamat di kalangan para paderi Keuskupan Sandakan.

Kita tidak boleh mengasingkan diri daripada komuniti. Inilah yang dipanggil gereja Sinodal, dipersatukan dan diberkati oleh Tuhan."